

BOSNA I HERCEGOVINA
Federacija Bosne i Hercegovine
Tuzlanski kanton
OPĆINA GRAČANICA
OPĆINSKO VIJEĆE

Broj predmeta: 01-05-03131-20123
Broj akta: 01EH-001
Gračanica, 30. 09. 2013. godine

Z A P I S N I K
SA 11. SJEDNICE OPĆINSKOG VIJEĆA
GRAČANICA

Održane dana 28. 08. 2013. godine u sali za sjednice nove zgrade Općine, sa početkom u 14.00 sati.

Početu sjednice prisustvovalo je 29 članova Općinskog vijeća Gračanica. Odsutan je bio Mirza Omerdić.

Sjednicu je otvorio i istom predsjedavao Ibrišević Edin, predsjedavajući Općinskog vijeća Gračanica, zajedno sa zamjenikom Gazibegović Seadom i sekretarom Općinskog vijeća Mujačić Zehrom.

Zapisnik vodila Mevlida Naimkadić, a vršilo se i tonsko snimanje sjednice.

Pored članova Općinskog vijeća sjednici su prisustvovali i: Općinski načelnik Nusret Helić, Azra Mustajbašić, općinski pravobranilac Jasminka Imširović, šefovi službi za upravu Aida Hodžić, Zijad Dedić i Mustafa Bajić, izvjestioci Amir Zejnilagić, Saima Zaketović, Vanesa Mahmutović, zatim direktorica JZU Dom zdravlja Zehra Karahasanović, poslanik u Skupštini TK Džemal Jukan, predstavnica OSCE-a Mujezinović Svjetlana, te predstavnici sredstava informisanja.

Zapisnik sa 10. sjednice Općinskog vijeća Gračanica usvojen je jednoglasno sa 29. glasova "ZA".

Pitanja i inicijative kandidovali su:

Almedin Devedžić:

"Ja imam tri vijećničke inicijative. Obzirom da se ovih dana u MZ-i Lukavica proslavljaju dani kojima se ova lokalna zajednica ponosi, a koji se u narodu i njenoj istoriji zovu "Dani odbrane Lukavice 1992. – 1995." svim svojim mještanima, svim borcima koji su u najtežim trenucima dali svoj doprinos odbrani, čestitam Dan odbrane MZ-e Lukavica. Koristim ovu govornicu da poručim svim borcima u BiH koji su branili Lukavicu i ostale šire prostore Gračanice da ih sugrađani, mlađi naraštaji Lukavice nisu zaboravili i živjet će dani odbrane Lukavice dok postoji i Lukavica. Danas Lukavica nije ono zbog čega su se njeni borci borili, a njeni šehidi dali ono najsvetije, svoje živote. Danas Lukavica nije ni izbliza ono što je bila krajem osamdesetih kad je kao nijedna do tada MZ imala rasvjetu, putnu komunikaciju prema Doboju i Gračanici, zemljoradničku zadругu, pogon Feringa, veterinarsku ambulantu, to jest ono o čemu su lokalne zajednice samo mogle sanjati. Danas Lukavica dijelom zbog svog položaja, zbog nedovoljnog poslijeratnog angažmana vlasti koje nisu u dovoljnoj mjeri znale odgovoriti za trenutke obnove, često i zbog ignorisanja općinskih vlasti i zastoja rješavanja važnih problema, zbog svega ovog Lukavica nije ono što njeni građani očekuju, obzirom na doprinos i žrtve koje je dala u odbrambeno oslobodilačkom taru. Razočaranost i opća depresija prisutni su na svakom koraku i nije ni čudo što tamo ljudi dižu ruku na sebe. Osjećaju se napušteni od svih, a posebno od onih koji bi trebali da se brinu. Bez obzira na to Lukavica slavi svoj dan i nadam se da će njen razvoj krenuti krupnijim i mnogo bržim koracima. Evidentno je da se o ovoj MZ-i treba mnogo više povesti računa. Svijetla tačka ove sumorne stvarnosti je pokretanje

aktivnosti u konačnom spajanju Lukavice sa centrom općine, jer kako vam je svima poznato Lukavica je jedina MZ-a koja nije spojena putom sa centrom općine. I da se u nju može doći jedino preko druge općine, to jest općine Doboj Istok. Hvala načelnice što ste uvažili i realizovali moj vijećnički amandman vezan za rekonstrukciju puta Lukavica-Malešići. Lukavica slavi što je i to nakon dužeg vremena došlo na red. Narod Vam je, gospodine načelnice na tome zahvalan. Pri kraju su radovi na prvoj dionici puta dužine od 3.000 metara ali kako stvari stoje neće se moći privesti kraju obzirom da je potrebno sanirati četiri klizišta za što je potrebno obezbijediti dodatnih 10.000,00 KM, kako bi se ova najteža dionica pustila u saobraćaj i olakšao položaj stanovnika Lukavice. Koristim ovu govornicu da Vas u ime mještana Lukavice zamolim da uložite dodatni napor i u okviru dozvoljenih sredstava budžeta Općine Gračanica za 2013. godinu obezbijedite ova sredstva kako se ne bi desio zastoj rekonstrukcije koji je, ukoliko se sredstva ne obezbijede vrlo evidentan. Nadam se da će Dani odbrane Lukavice 2013. biti zapamćeni konačnim probijanjem puta do Gračanice čime ćemo se i mi Lukavičani u pravom smislu riječi osjećati dijelom općine Gračanica.

Sljedeća moja inicijativa je zahtjev upućen Upravnom odboru Nogometnog saveza TK, Komisiji za propise:

Obzirom da je NK „Jedinstvo“ iz Lukavice u nogometnoj sezoni 2012/2013. bilo sudionik takmičenja u II kantonalnoj ligi i da se isti plasirao u I kantonalnu ligu u kojoj se treba takmičiti u sezoni 2013/2014. godine. Odlukom Upravnog odbora NS TK pomenuti klub je vraćen u II kantonalnu ligu, čime je NK „Jedinstvo“ oštećen i plasman koji je napravio u II kantonalnoj ligi poništen. Napominjem da je u pitanju protuzakonita odluka jer su svi argumenti koji potvrđuju kantonalni prvoligaški status NK „Jedinstvo“ na strani ovog kluba. Bez obzira što su članovi Upravnog odbora NS TK gosp. Nusret Helić i Mehmed Mehinović bili suzdržani ne slagajući se sa tom odlukom, na čemu im se NK „Jedinstvo“ zahvaljuje, Upravni odbor na osnovu oduke Komisije za propise NS TK donio je protuzakonitu odluku. Ovim putem pozivam Komisiju za pravne propise NS TK i Upravni odbor istog da hitno preispitaju donesenu odluku i isprave pogrešku, a ukoliko to ne učine NK „Jedinstvo“ će pokrenuti krivične prijave i sudski spor protiv pojedinaca iz gore navedenih institucija.

Treća inicijativa je upućena Općini Gračanica, Službi za prostorno uređenje:

Inicijativa za pripremanje odluke o proglašenju javnog interesa za kantonalnu cestu Klokočnica-Lukavica-Lukavica Rijeka-Sjenina Rijeka, a čiji se dio nalazi na teritoriji općine Gračanica i upućivanje istog puta kantonalnim organima na proglašenje.

Obzirom da se gore navedeni dio puta održava kao kantonalni i da se o njegovom održavanju brine Kantonalna direkcija za ceste TK, isti nije obilježen kao takav i nikada nije proglašen od strane Skupštine TK kao takav. Ovom prilikom od Službe za prostorno uređenje Općine Gračanica zahtijevam da hitno pripremi gore navedenu odluku kako bi se ovaj kantonalni put u saradnji sa nadležnim iz Općine Doboj Istok zakonskom procedurom proglasio kantonalnim, odnosno regionalnim. S poštovanjem.

Selihana Čurić:

“Moj zahtjev je upućen RTV TK za popravku TV odašiljača na Dujskim vodama u općini Doboj Istok:

Poštovani, obzirom da signal TV TK već duže vrijeme ne egzistira sa TV odašiljača Dujska voda, zahtijevam da se hitno utvrdi razlog i da se problemi oko neodašiljanja signala ove TV kuće u najkraćem roku riješe. S poštovanjem.“

Hasan Puškar:

“Imam inicijativu prema Općinskom načelniku koja ima tri stava.

Ako može da u skladu s mogućnostima omogući sanaciju dijela ulice na ulazu u OŠ “Hasan Kikić” jer tu ima u dužini od 10-15 metara više udarnih rupa nego negdje na makadamskom putu.

Druga inicijativa se odnosi isto na slivnik a to je dole u blizini samoposluge Variplast. To je slivnik koji za sve drugo služi osim kao slivnik. To je udarna rupa u dužini dva metra koja tu stoji godinama. Pa ako je to nečija dužnost neka se to ukloni ili neka se zabetonira.

Treće je saobraćajni znak u blizini Druge osnovne škole iz pravca bolnice prema regionalnom putu. Tu je bio postavljen saobraćajni znak da se nalazi usporivač brzine u dužini od pedeset metara, ograničen je deset na sat. Ja sad trenutno govorim što se tiče auto škola. Kadnirati

su dužni da se pridržavaju deset na sat i u tom momentu kad oni uspore svi nas zaobilaze i direktno se ugrožavaju djeca koja se nalaze u bilizini škole. Pa da se sada tu postvi druga saobraćajna signalizacija i time taj problem riješi.”

Tursunović Esad:

“Iskoristio bih priliku zbog prisustva direktorice JZU Dom zdravlja Gračanica i pitao vezano za zapošljavanje. Vidio sam dosta novih faca, odnosno lica zaposlenih, da li u Bolnici ili Domu zdravlja. Na osnovu čega? Pošto smo mi osnivači trebali bi znati.”

Zatvoreno je vrijeme za postavljanje pitanja i inicijativa.

Direktorica Doma zdravlja Zehra Karahasanović je dala odgovor na pitanje Tursunović Esada:

“Drago mi je da je postavljeno pitanje kako bi se riješile neke nedoumice. Već nekoliko godina imaju projekti koji su bili u organizaciji našeg Biroa rada, a i akcija koju je načelnik organizovao za pripravnike i volontere. Dom zdravlja se tu uvijek uključivao i to sa maksimalnim brojem te omladine koji su mogli biti u tom momentu primljeni. Osim toga, mi imamo pripravnike jer je ovdje srednja medicinska škola sa ogromnim brojem djece. Podatak od možda prije pola godine je da ih je oko 300. Bez obzira što svaki taj pripravnčki rad nas košta, plaćamo doprinose državne a ne toj djeci, mi u kontinuitetu držimo minimalno deset pripravnika, tako da smo mi u 2012. godini kroz angažovanje tih pripravnika i njihovo zapošljavanje uložili 30.000,00 KM, jer to je jedina prilika da djeca koja nažalost ne mogu ovdje ostvariti zaposljenje da im se otvore vrata, što je trenutno aktuelno kao odlasci u Austriju, Njemačku itd. Vi ćete u svakom momentu tako moći vidjeti neke nove face što se tiče doma zdravlja. Ne znam koliko je u to uključena sama bolnica ali isto tako znam da je prije dvije godine i sada, razlika negdje oko šest ljudi. Tu je u međuvremenu došlo i stipendista, zaposlenika u stomatološku službu i u porodičnu medicinu. Do nekog drastičnog povećanja redovno uposlenih ljudi nije došlo.”

Prešlo se na raspravu o predloženom dnevnom redu 11. sjednice Općinskog vijeća Gračanica.

Predsjedavajući Vijeća Edin Ibrišević je predložio dopunu dnevnog reda sa još dvije tačke i to: Odluka o podizanju spomen-obilježja u MZ-i Donja Orahovica i Odluka o promjeni statusa nepokretnosti u opštoj upotrebi.

Predložene odluke je već razmatrala Komisija za propise i Statut i nije imala primjedbi.

Za diskusiju se javio Gadžić Rahim:

“Ja nisam bio na kolegiju Općinskog vijeća ali mi je rečeno da je na kolegiju bio stav da se ne proširuje dnevni red sa novim odlukama, nevezano za spomen-obilježje. Hasan Puškar je bio na kolegiju i kaže da je zauzet stav. Je li zauzet takav stav?”

Predsjedavajući Vijeća je naglasio da prema Poslovniku se može dopuniti dnevni red i odlučio se na taj korak, zato što je bilo dovoljno vremena da to razmotri i Komisija za propise a i pripremljen je materijal koji treba razmatrati. Materijal nije obiman, a na vijećnicima je da se izjasne o dopuni dnevnog reda.

Prešlo se na izjašnjavanje i dopuna dnevnog reda 11. sjednice Općinskog vijeća Grčanica sa još dvije tačke dnevnog reda usvojena je jednoglasno.

Konačan dnevni red 11. sjednice pročitao je predsjedavajući Vijeća i glasi:

1. IZVJEŠTAJ O IZVRŠENJU BUDŽETA OPĆINE GRAČANICA ZA PERIOD 01. 01. – 30. 06. 2013. GODINE
Izjestilac: Nusret Helić, Općinski načelnik

2. IZVJEŠTAJ O UTROŠKU SREDSTAVA TEKUĆE REZERVE ZA PERIOD
01. 01. – 30. 06. 2013. GODINE
Izvjestilac: Nusret Helić, Općinski načelnik
3. SAGLASNOST NA STATUT JZU DOM ZDRAVLJA GRAČANICA
Izvjestilac: Predstavnik JZU Dom zdravlja Gračanica
4. ODLUKA O PODIZANJU SPOMEN-OBILJEŽJA U MZ-i DONJA ORAHOVICA
Izvjestilac: Amir Zejnilagić
5. ODLUKA O PROMJENI STATUSA NEPOKRETNOSTI U OPŠTON UPOTREBI
Izvjestilac: Aida Hodžić, šef Službe
6. ZAKLJUČAK IMOVINSKO-PRAVNE SLUŽBE
Izvjestilac: Aida Hodžić, šef Službe

Dnevni red 11. sjednice Općinskog vijeća Gračanica usvojen je jednoglasno sa 29 glasova „ZA“.

Data je pauza od pet minuta kako bi se vijećnicima podijelio materijal za dopunjene tačke dnevnog reda.

Nastavku sjednice prisustvovalo je 29 članova Vijeća i odmah se prešlo na rad po usvojenom dnevnom redu.

TAČKA 1:

IZVJEŠTAJ O IZVRŠENJU BUDŽETA OPĆINE GRAČANICA ZA PERIOD 01. 01. – 30. 06. 2013. GODINE

Uvodno obrazloženje po prvoj tački dnevnog reda dao je Općinski načelnik Nusret Helić:
“Poštovani predsjedavajući, uvaženi vijećnici, mediji i gosti,

Dozvolite mi da vas pozdravim i da poslije julske pauze zaželim uspješan nastavak rada Općinskog vijeća u interesu građana ove općine.

Pred vama je izvještaj o izvršenju budžeta za prvo polugodište 2013.godine.

Uz Izvještaj ste dobili i detaljno obrazloženje iz koga se vidi šta se dešavalo u prvih 6 mjeseci kada su u pitanju prihodi i rashodi.

I pored toga ja ću iskoristiti priliku da dam još neka pojašnjenja i ukažem na moguća dešavanja u narednom periodu budžetske godine.

Ukupni prihodi su ostvareni u iznosu od 5.176.317 KM ili 91,72 %, odnosno manje su ostvareni u odnosu na plan za oko 500.000 KM.

Kad se tiče prihoda to su:

- Porezni ostvareni u iznosu od 3.378.384 KM ili 104,94 %
- Neporezni 1.115.050 KM ili 113,66 %
- Potpore – grantovi 428.585 KM ili 55,81 %
- Primici 254.298 KM ili 43,84 %

Ukupni izdaci sa otplatom duga ostvareni su u iznosu od 3.852.563 KM ili 68,27 %.

Sami izdaci su ostvareni u iznosu od 3.619.415 KM ili 68,36 %.

Iz izvještaja se vidi da su izdaci manje realizovani u odnosu na prihode za 1.323.754 KM, odnosno to je, ja bih rekao, privremeni suficit jer stanje se dakle iz dana u dan mijenja..

Čega je on rezultat, pojasnit ću kasnije.

Kada je riječ o prihodima, oni su ostvareni 99 %, gotovo kako su i planirani.

Porezni su veći za oko 5 %, a neporezni za 13 %.

U odnosu na naša strahovanja s' početka godine, ovo je odlično ostvarenje.

Ovakvo stanje prihoda je prije svega rezultat većeg ostvarenja prihoda po osnovu poreza na promet nekretnina.

U odnosu na plan za 6 mjeseci, prihodi od ovih poreza veći su za oko 400.000 KM.

Takođe su veći i neporezni prihodi po osnovu rente, komunalne takse, grantova od kantona za projekte iz prošle godine i slično.

Ono što nije dobro je što su prihodi od PDV-a i poreza na dohodak manje ostvareni za oko 8 % ili 230.000 KM.

Očekuje se i dalje pad ovih prihoda, a i svjedoci ste informacija koje dolaze iz Federacije a i iz Uprave za indirektno oporezivanje. Evo kod nas su za sedam mjeseci oni manji za oko 240.000,00 KM, dakle gotovo jedan procenat malte ne za svaki mjesec.

Manje su ostvareni i neki neporezni prihodi, tako da se mora biti krajnje oprezno i u realizaciji budžeta u drugom polugodištu.

Kretanje rashoda ste takođe vidjeli iz izvještaja. To stanje se dosta izmijenilo u protekla 2 mjeseca, jer smo realizovali neke projekte i sredstva prema mjesnim zajednicama, političkim strankama, nevladinim organizacijama, studentske i đачke kredite i slično.

Ako pogledamo sintetiku izdataka po ekonomskoj klasifikaciji, vidi se da nije došlo do većih devijacija, sem kod budžetske rezerve koja je više realizovana i kod kapitalnih izdataka koje su manje ostvareni, jer je realizacija nekih projekata bila u toku ili se sada realizuju.

No, ovo se odnosi na pola godine i puno toga će se mijenjati u drugom polugodištu.

Rekao sam da ću vam nešto reći i o suficitu ili nerealizovanim izdacima, iako se, kao što sam već rekao stanje do danas izmijenilo.

Suficit je u većini rezultat nerealizovanih projekata i namjenskih sredstava, ali i našeg odgovornijeg odnosa da rezervišemo i sačuvamo sredstva za neke ugovorene projekte kao što su naprimjer: neki putevi u Sokolu, izgradnja vodovodnog sistema Bijela Polja u Gračanici, asfaltiranje nekih ulica u gradu, karta upotrebne vrijednosti zemljišta, protivgradna odbrana, Dom u Gornjoj Orahovici, spomen obilježje u Škahovici, bosanska kuća u Varoši i slično. Dakle to su projekti ugovoreni i realizuju se i zbog toga smo bili oprezni u realizaciji.

Takođe smo vodili i morat ćemo voditi računa da sačuvamo jedan dio sredstava za prioritetne izdatke (plaće uposlenika, naknade vijećnicima, vraćanje kredita i slično).

Naše su procjene da će prihodi po osnovu PDV-a i poreza na dohodak i dalje padati i treba biti spreman na rebalans budžeta, sem ako se ne dese neki novi prometi nekretnina i neke nove rente i slično. Ipak ja očekujem da ćemo uspjeti realizovati većinu projekata iz budžeta i zbog toga moramo biti do kraja odgovorni i racionalni.”

Komisija za propise i Statu je razmatrala Izvještaj i nije imala primjedbi.

Učesnici u diskusiji su:

Hasan Fehratović:

„Neću previše ulaziti u srž ovog dokumenta, imam obrazloženje a imamo evo i dodatno obrazloženje načelnika i samo konkretno nekoliko pitanja. Naravno u ime kluba, a na inicijativu predsjednika VMZ-e Miričina dužan sam da upitam sljedeće. Vijeće MZ-e je dostavilo negdje u četvrtom ili petom mjesecu što je ovdje protokolirano, odluke zajedno sa predmjerom i predračunom za tri kapitana projekta koji su i planirani budžetom u toj MZ-i, a evo do današnjeg dana nije ništa realizovano. Radi se o odluci za izgradnju kanalizacione mreže u naselju Brdo, izgradnja spomen-obilježja i rekonstrukcija mostova za Gornju Miričinu. Dakle, u ime VMZ-e, odnosno konkretno u ime predsjednika Vijeća dužan sam s obzirom da ta MZ-a nema vijećnika, da postavim ova pitanja.“

Pjanić Safet:

„Ja bih u ime Kluba BPS-a rekao par stvari vezano za ostvarenje budžeta za prvih šest mjeseci. Mislim da je za pozdravit ovo što je načelnik malo prije elaborirao kad je u pitanju ostvarenje budžeta, međutim gledajući na pravo stanje ostvarenja budžeta za šest mjeseci ono nije baš onako kako je načelnik to lijepo rekao. Mislim da to može biti opasnost za drugih šest mjeseci

jer te pare koje su iskazane kao suficit nisu ni operativne, nisu pare na računu. One su negdje pod ručnom kočnicom i vjerovatno je to rezultat neredovnih projekata od prije, koji su u ladici nekih drugih stvari koje nisu knjižene kao rashodi. Tamo je navedeno da su prihodi realizovani sa 100%-nim indeksom a rashodi negdje sa 69%, što govori sve da nas čeka drugo poluvrijeme ove godine i da može biti zaista poteškoća i da će doći do rebalansa budžeta vjerovatno. PDV znači i dalje ima tendenciju pada i u pitanju su prihodi od PDV-a kao i porez na dohodak. To su sve što kažu najoperativnije pare, a sve ostalo može biti i dovesti do problema. Sve u svemu hoću da kažem da moramo zaista biti oprezni, štedljivi. Dobro je što smo u Izvještaju imali uporedne podatke, znači ponašalo se štedljivo. Mislim da je ovaj budžet koji je prikazan racionalan i štedljiv ali ovo što sam malo prije rekao, moramo biti svi oprezni jer zaista može doći do teško ostvarenih prihoda u drugih šest mjeseci. Klub BPS-a apsolutno pozdravlja ovakav izvještaj ostvarenja budžeta i daje punu podršku.“

Općinski načelnik Nusret Helić:

„Samo da pojasnim. Možda je greška u riječi Pjanića jer je rekao da je suficit papirnato. Pare imaju, nije papirnato. Stanje se mijenja iz dana u dan, krećemo sa realizacijom projekata i vi znate da su već neki projekti krenuli poslije šest mjeseci. Dakle, imamo mi ove pare, vodimo računa i ponašat ćemo se ovako kako sam i rekao.“

Nije bilo više učesnika u diskusiji i Izvještaj o izvršenju Budžeta Općine Gračanica za period 01. 01. – 30. 06. 2013. godine je usvojen sa 28 glasova „ZA“ u 1 „SUZDRŽAN“.

TAČKA 2:

IZVJEŠTAJ O UTROŠKU SREDSTAVA TEKUĆE REZERVE ZA PERIOD 01. 01. – 30. 06. 2013. GODINE

Učesnici u diskusiji su:

Esad Tursunović:

„Ja bih htio samo da pitam načelnika i kolegu Vehida vezano za ovu stavku 16.000,00 KM. Pošto ima još vodovoda i nije Gornja Orahovica jedina što se tiče rješavanja. Da li se Vehide ubiru sredstva jer je baš povisok iznos za jednokratnu pomoć.“

Odgovor je dao Općinski načelnik Nusret Helić:

„Jeste povelik iznos za jednokratnu pomoć. Nije to jednokratna pomoć. Vi znate da je Gornja Orahovica vršila bušenje i pronašla odgovarajuće količine vode koje je trebalo uvesti u sistem i raspisan je tender. Pola para je obezbijedilo VMZ-e iz sredstava za vodosnabdijevanje i logično je bilo da mi odgovrimo i u tom momentu jedina moguća stavka je bila budžetska rezerva. Zahvaljujući tome sad Gornja Orahovica ima redovno snabdijevanje vodom. I u Miričini je takođe za vodosnabdijevanje negdje oko 5.000,00 KM ne znam tačno, u pitanju je pumpa i spram sredstava sa kojima raspolažemo mislim da smo to dobro uradili. Nismo mogli čekati rebalans i vjerovatno ako dođe do rebalansa ova stavka će se premjestiti tamo gdje treba, a ostat će budžetska rezerva za neke druge. Ako mislite da smo pogriješili, pravo je vijećnika da i kritikuje. Dakle stavili smo vodu u sistem, a evo imamo zahtjev MZ-e Donja Lohinja. Ista stvar, da postavite neke instrumente da bi imali bolje snabdijevanje. Ovih dana ćemo isto intervenisati jer je u pitanju voda.“

Esad Tursunović:

„Da ne bude da sam radikal i da osporavam te projekte. Slažem se, treba pomoći. Po tome dođe da je pumpa trideset i nešto hiljada. Onda je pogrešno uknjiženo kao pomoć, a ja nemam ništa protiv.“

Vehid Osmanović:

„Za sve one koji ne znaju, većina vijećnika zna, a zna to i Tursunović Esad. Trebao je pitati Hasana, on mu je u klubu jer je i on član Gornje Orahovice, nisam samo ja. MZ-a Gornja Orahovica je ove godine uradila svojim vlastitim sredstvima, odnosno iz suficita iz prošle godine, bušotinu koja je koštala preko 20.000,00 KM. Mi smo namirili iz dodatnih prihoda, imamo ih mjesečno ali oni nisu veliki, tako da smo mi sami vlastitim sredstvima izgradili tu bušotinu. A ovo nije pumpa,

ovo je kompletan sistem za napajanje. Tu je i pumpa i šaht i sve ostalo. Možda je malo pogrešno napisano i načelnik je izašao u susret, s obzirom da budžetom nije predviđeno, da se to odmah ubaci u sistem jer ta bušotina daje 8 litara u sekundi i riješila je problem 554 priključenih. Evo samo malo da pojasnim ako nekome nije jasno.“

Nije bilo više učesnika u diskusiji i Izvještaj o utrošku sredstava tekuće rezerve za period 01. 01.-30. 06. 2013. godine je usvojen sa 28 glasova „ZA“ i 1 „SUZDRŽAN“.

TAČKA 3:

SAGLASNOST NA STATUT JZU DOM ZDRAVLJA GRAČANICA

Statut je razmatrala Komisija za propise i Statut i nije imala primjedbi.

U diskusiji su učestvovali:

Hasan Fehratović:

„U ime Kluba SDA samo nekoliko pitanja. Naravno mi smo ovo detaljno pratili. Možda je trebalo u obrazloženju reći da se najviše tiče usklađivanja Statuta sa novim Zakonom o zdravstvenoj zaštiti. Ima nekih nedoumica što smo razmatrali na klubu, a možda i nekih tehničkih stvari. Konkretno evo u članu 23. stoji:

- Zdravstvena ustanova može obavljati zdravstvenu djelatnost ako ispunjava uslove propisane ovim zakonom. Možda navesti konkretno, s obzirom da je to akt, ostaje neodređeno kojim je to zakonom. Zatim, ovaj stav koji glasi, a da se direktorica ne naljuti, piše:

- Odlučuje o korištenju finansijskih sredstava u pojedinačnom iznosu od 20.000,00 KM.

Samo pitanje. Imamo sličnih situacija i u drugim ustanovama pa pitam je li i ta u skladu sa zakonom jer nisam uspio to naći u Zakonu o zdravstvenoj zaštiti, a nemam ništa protiv. Dalje, gdje god dođemo bilo da je služba hitne pomoći ili ambulante porodične medicine imamo onaj sandučić za eventualne prigovore i žalbe. Ovdje su nabrojane neke komisije za poboljšanje kvaliteta i sigurnosti, za dopunski rad. Da li je potrebno formirati i komisiju za prigovore pacijenata. I u članu 93. u stavu 3. se pominje sindikalna organizacija. S obzirom da sam i ja uposlenik jedne ustanove, pitam da li je bilo potrebno uključiti u članu 93. i u prva dva stava mišljenje i stavove sindikalne organizacije.“

Esad Tursunović:

„Ja bih se zahvalio direktorici na odgovoru na moje postavljeno pitanje i Izvještaju koji nam je predočila. Međutim, tražim od predsjedavajućeg da nam za sljedeću sjednicu Dom zdravlja i Opća bolnica dostave Izvještaj o zapošljavanju. Ja dobro znam i vidio sam ta lica koji nisu ni studenti ni stipendisti ni volonteri i imaju po 40 godina. Drugo iz iskustva, imali smo slučaj sa Fadilom Mešićem. Primljen, otpušten, pa ponovo primljen i to govorim da nam se takve stvari više ne događaju. I još da pitam u čijoj je nadležnosti mrtvara. Tu bih zamolio načelnika da pokrene inicijativu jer ono nije mrtvara, ono je sušara. Neki dan sam imao smrtni slučaj pa smo unijeli ženu u prostoriju gdje je temperatura 50 stepeni. Pola je sušara, a pola ostava. Gračanica je multietnički grad i to treba urediti kako bi se koristila u namjenu koja joj odgorava.“

Direktorica Doma zdravlja je odgovorila na pitanja i sugestije. Prihvatila se primjedba da se navede Zakon o zdravstvenoj zaštiti. Obrazložila je i visinu 20.000,00 KM kao i za formiranje komisije i učešće sindikata naglašavajući da je to regulisano od strane Agencije AKAZ, a Sindikalna organizacija učestvuje u onom što je Zakon naveo.

Edin Ibršević je postavio pitanje vezano za član 43. gdje stoji:

„Ustanovom rukovodi direktor. Direktora Ustanove imenuje i razrješava Upravni odbor Ustanove uz prithodnu saglasnost Općinskog načelnika.“ Do sada je stajalo osnivača.

Jasminka Imširović, pravobranilac je ne izlazeći za govornicu a i Zehra Mujačić sekretar općinskog vijeća konstatovale da je ta odredba u skladu sa Zakonom.

Hasan Puškar je ne izlazeći za govornicu zatražio da se direktorica izjasni o primjedbama iznesenim od strane Hasana Fehratovića u ime Kluba SDA.

Nakon toga je izašao za govornicu i predložio :

„Bile su primjedbe, direktorica je prihvatila primjedbe. Znači Vi predsjedavajući ste dužni iznijeti šta je od tih primjedbi prihvaćeno, pa tek onda dati na glasanje. I mi se u nešto ovdje razumijemo. Treba to razjasniti i reći šta će se od toga uvrstiti.“

Ponovo je za govornicu izašao Hasan Fehratović:

„U ime Kluba SDA sam ja iznio neke dopune, primjedbe i pitanja itd. Prva je ova u članu 23. da se navede konkretno kojeg zakona i to je direktorica prihvatila jer je ispušteno. Ostalo su bila pitanja. Ovdje je nedoumica između direktorice i Hasana o visini sredstava o kojima direktno odlučuje direktor JZU, bez Upravnog odbora a to je do 20.000,00 KM. I direktorica je kazala da je takvu jednu odluku donio Upravni odbor da to bude granica. I u redu je i na to smo dobili pojašnjenje. Sljedeće, komisija za prigovore pacijenata, direktorica je odgovorila da već postoji i spominje se to evo čini mi se u sklopu člana 67. AKAZ spomenuste. I evo rečeno je vezano za član 93. Sindikalna organizacija i njeno učešće da stoji i za one akte koji su doneseni u skladu sa Zakonom. To je to, da ne stoji i slično. Mislim da smo se razumjeli.“

Predsjedavajući Vijeća je zamolio direktoricu da se izjasni o primjedbama.

Nakon toga Općinsko vijeće je jednoglasno sa 29 glasova „ZA“ dalo saglasnost na Statut JZU Dom zdravlja Gračanica.

Data je pauza na zahtjev predsjednika Kluba vijećnika SDA.

Nastavku sjednice prisustvovalo je 28 članova Vijeća. Odsutan je i Tursunović Esad.

TAČKA 4:

ODLUKA O PODIZANJU SPOMEN-OBILJEŽJA U MZ-i DONJA ORAHOVICA

Nije bilo učesnika u diskusiji i Odluka o podizanju spomen-obilježja u MZ-i Donja Orahovica je usvojena jednoglasno, sa 28 glasova „ZA“.

TAČKA 5:

ODLUKA O PROMJENI STATUSA NEPOKRETNOSTI U OPŠTOJ UPOTREBI

Na sjednicu se vratio sa pauze vijećnik Tursunović Esan.

Nije bilo učesnika u diskusiji i Odluka o promjeni statusa nepokretnosti u opštoj upotrebi je usvojena jednoglasno, sa 29 glasova „ZA“.

TAČKA 6:

ZAKLJUČAK IMOVINSKO-PRAVNE SLUŽBE

Nije bilo učesnika u diskusiji i Zaključak Imovinsko-pravne službe je usvojen jednoglasno, sa 29 glasova „ZA“.

Sjednica je završena 15.20 sati.

Zapisnik vodila: Mevlida Naimkadić

Tonski snimak sjednice uredno je arhiviran.

Mevlida Naimkadić

**PREDSJEDAVAJUĆI
OPĆINSKOG VIJEĆA**

mr.sci. Edin Ibrišević